

#### 4.2.7. *Finansijska kontrola*

Bosna i Hercegovina je ostvarila ograničeni napredak u oblasti *finansijske kontrole*.

Zabilježen je određeni uspjeh u oblasti **javne interne finansijske kontrole (PIFC)**. Zakoni o internoj reviziji su usvojeni na državnom i entitetskom nivou. Formirana je radna grupa za izradu nacrtu sveobuhvatne politike PIFC-a kojim se garantuje izbalansirani razvoj kontrole i sistema revizije. Ipak, do sada nije bilo vidljivih rezultata. Nije uspostavljena centralna jedinica za usklađivanje za PIFC.

Kada se radi o **vanjskoj reviziji**, tri institucije glavnog revizora u zemlji nastavljaju sa provođenjem svog zajedničkog strateškog plana razvoja 2007-2012. na osnovu tri zakona o vanjskoj reviziji. Tri institucije glavnog revizora saraduju kroz Tijelo za koordinaciju. Nakon odgode u trajanju od dvije godine, glavni državni revizor imenovan je u junu 2008. godine. Institucija državnog revizora ima 34 zaposlena. Postupanje prema izvještajima i preporukama institucija glavnog revizora i dalje je nezadovoljavajuće. Postojanje i nezavisnost institucija glavnog revizora još uvijek nisu zagarantovane ustavima Bosne i Hercegovine.

Sve u svemu, pripreme Bosne i Hercegovine u oblasti finansijske kontrole ostaju u početnoj fazi. Uvođenje sveobuhvatnih politika PIFC-a još uvijek čeka na rezultate Radne grupe za politiku PIFC-a. I dalje je potrebno raditi na statusu institucija glavnog revizora i kvalitetu vanjske revizije.

#### 4.2.8. *Statistika*

Izvjestan napredak ostvaren je na području *statistike*.

U pogledu statističke infrastrukture, značajno je unaprijeđena saradnja između državne Agencije za statistiku (BHAS) i Zavoda za statistiku Federacije. Ipak, potrebni su dalji naponi na poboljšanju koordinacije sa Zavodom za statistiku Republike Srpske. BHAS je izradio novu šemu organizacione strukture kojom se predviđa značajno povećanje broja zaposlenih i obuhvatanje većeg broja sektora. Slične šeme organizacione strukture izrađene su za entitetske zavode za statistiku. Izgradnja kapaciteta sektora za statistiku u Bosni i Hercegovini je od velikog značaja i treba ostati prioritet.

Zakon o statistici i Sporazum iz 2005. godine čiji je cilj da ojača koordinacijsku ulogu BHAS-a u usklađivanju metodologija i diseminaciji podataka na državnom nivou, nije pravilno proveden. Potpisan je protokol između BHAS-a i Uprave za indirektno oporezivanje (UIO) o razmjeni podataka o vanjskoj trgovini, ali se još uvijek ne provodi.

Određeni napredak je postignut na području **klasifikacije** i registara. Klasifikacija proizvoda po aktivnostima (CPA) usklađena je sa Evropskom klasifikacijom CPA 2002. Klasifikacija lične potrošnje prema namjeni (COICOP) je finalizirana i postignut je visoki stepen usklađenosti sa međunarodnim standardima. Napreduje izrada statističkog poslovnog registra.

Izvjestan napredak ostvaren je na području sektorske statistike, uključujući statistička istraživanja. Na području demografije i socijalne statistike, preduzeti su početni koraci na pripremi popisa stanovništva i domaćinstava. Ipak, politička odluka kojom se potvrđuje da će popis stanovništva biti izvršen 2011. godine još uvijek nije donesena. BHAS je izradio publikaciju o ravnopravnosti polova za cijelu zemlju.